

四庫全書

子部

欽定四庫全書

御定佩文齋廣羣芳譜卷十

穀譜

大豆

按黑豆黃豆皆名大豆原譜分而為二今從齊民要術併合為一

原豆者莢穀之總名也大者謂之菽

增本草大豆有

黑白黃褐青斑數色

原黑豆處處有之苗高三四尺

蔓生莖葉蔓延葉圓有尖色青帶黑上有小白毛秋開小白花成叢結莢長寸餘多者五六粒亦有一二粒者

經霜乃熟緊小者為雄豆入藥良大者止堪食用作豉  
及喂牲畜味生則平炒則熱煮則寒作豉主發散造醬  
及生黃卷平牛食之溫馬食之冷一體之中用之數變  
小兒以炒豆同猪肉食多壅氣致死十歲以上則無妨  
服葦麻子及厚朴者並忌炒豆犯之脹滿致死黃豆亦  
有大小二種種耘收穫苗葉莢其與黑豆無異惟葉之  
色稍淡結角比黑豆稍肥其豆可食可醬可豉可油可  
腐腐之滓可喂猪荒年人亦可充饑油之滓可糞地其

可然火葉名藿嫩時可為茹

增廣志有黃落豆有御

豆

其豆角長

有場豆

葉可食

有青有黃者

齊民要術今世大

豆有黑白二種及長梢牛踐之名又有黑高麗豆鶩豆

大豆類也

彙考增詩豳風七月亨葵及菽

小雅中原有菽庶民

采之采菽采菽筐之筥之傳菽所以芼太牢而待君

子也箋采之者采其葉以為藿三牲牛羊豕芼以藿王

饗賓客有生俎乃用鉶羹故使采之

原大雅藝之荏

菽荏菽蒹蒹

增禮記檀弓

啜菽飲水盡其歡

月令

孟夏之月天子食菽與雞注菽實乎甲堅合屬水雞木

畜時熟食之亦以安性也

原左傳周子有兄而無慧

不能辨菽麥注菽大豆也豆麥殊形易別故以為癡者

之候

增戰國策張儀為秦連橫說韓王曰韓地險惡

山居五穀所生非麥而豆民之所食大抵豆飯藿羹注

藿菽之少者姚云史記後語作非菽而麥下文亦作菽

古語只稱菽漢以後方呼豆

史記周后稷本紀棄為

兒時屹如巨人之志其游戲好種樹麻菽麻菽美前

漢書鮑宣傳漿酒藿肉注師古曰藿豆葉也

楊惲傳

惲報孫會宗書詩曰田彼南山蕪穢不治種一頃豆落而為其人生行樂耳須富貴何時後漢書馮異傳王

郎起光武自薊東南馳晨夜草舍至饒陽蕪婁亭時天寒烈衆皆饑疲異上豆粥明旦光武謂諸將曰昨得公孫豆粥饑寒俱解後帝即位使中黃門賜以珍寶詔曰倉卒蕪婁亭豆粥滹沱河麥飯厚意久不報

晉書良

吏傳吳隱之介立有清操雖日晏歡菽不饗非其粟

隱逸傳翟莊端居華門歡菽飲水州府禮命及公車徵

並不就北齊書庾伏連傳冬至之日親表稱賀其

妻為設豆餅伏連問此豆因何而得妻對向於食馬豆

中分減充用伏連大怒典馬掌食之人並加杖罰唐

書韋貫之傳貫之居貧噉豆糜自給揚子子有含菽

縕絮而致滋美其親將以求孝也列子周諺曰晨出

夜入自以性之恒啜菽茹藿自以味之極呂氏春秋

得時之豆長莖短足其莢二七為族多枝數節競葉蕃

實淮南子河水中濁而宜菽焦氏易林中原有菽

以待饗食飲御諸友所求大得旦樹菽豆暮成藿羹

心之所樂志快心歡孝經援神契赤土宜菽春秋

佐助期豆神名靈殖姓樂長七尺大目通於時節原

東觀漢紀劉平嘗為餓賊所劫叩頭曰老母饑少氣力

待平為命願得還飯食母馳來就死涕泣發於肝膽賊

即遣去乃撫三斗豆以謝賊恩閔貢字仲叔太原人



也與周黨相友黨每過仲叔共啜菽飲水無菜茹 古

今注宣帝元康四年南陽雨豆 世說石崇為客作豆

粥咄嗟便辦恒冬天得韭萍蘢王愷為搯腕乃密貨崇

帳下都督問所以都督曰豆至難煮唯預作熟末客至

作白粥以投之韭萍蘢是搗韭根雜以麥苗爾 增鵬

冠子兩葉蔽目不見泰山雙豆塞耳不聞雷霆 拾遺

記樂浪之東有背明之國宜種百穀有統明豆其莖弱

自相縈纏有傾離豆言其豆見日葉垂覆地食者不老

不疾

益都耆舊傳朱倉字卿雲之蜀徙處士張寧受

春秋糴豆十斛屑之為糧閉戶精誦寧矜之歛得米二

十石倉不受一粒

爾雅翼八月雨為豆花雨

原雙

槐歲抄溫陵人家中元前數日以水浸黑豆暴之及芽

以糠皮寘盆內鋪沙植豆用板壓長則覆以桶曉則曬

之欲其齊而不為風日損也中元則陳於祖宗之前越

三日出之洗焯漬以油鹽苦酒香料可為茹捲以麻餅

尤佳色淺黃名鵲黃豆生弘治乙卯六月黥歛雨豆

隆慶六年四月陝西西寧衛天降黑豆徧地人食之則氣閉

集藻賦增晉張華豆羹賦乃有孟秋嘉菽垂枝挺英是刈是獲充簞盈筐香鑠和調周疾赴急時御一杯下咽三嘆時在下邑頗多艱難空匱之厄固不輟懼追念昔日啜菽永安

頌增宋蘇軾食豆粥頌道人親煮豆粥大衆齊念般若老夫試挑一口已覺西家作馬

五言古詩原魏曹植應詔作

煮豆然豆其豆在釜中泣

本是同根生相煎何太急

晉陶潛歸園田居種豆南

山下草盛豆苗稀晨興理荒穢帶月荷鋤歸道狹草木  
長夕露沾我衣衣沾不足惜但使願無違

七言古詩增宋蘇軾豆粥君不見滹沱流澌車折軸公

孫倉皇奉豆粥濕薪破竈自燎衣饑寒頓解劉文叔又  
不見金谷敲冰草木春帳下烹煎皆美人萍蘆豆粥不  
傳法咄嗟而辦石季倫干戈未解身如寄聲色相纏心

已醉身心顛倒自不知更識人間有真味豈如江頭千  
頃雪色蘆茅檐出沒晨煙孤地碓舂粳光似玉沙瓶煮  
豆軟如酥我老此身無著處賣書來問東家住卧聽雞  
鳴粥熟時蓬頭曳履君家去

方岳豆苗江南之筍天

下奇春風匆匆催上籬秦郵之薑肥勝肉遠莫達之長  
負腹先生一鉢同僧居別有方法供齋蔬山房掃地布  
豆粒不煩勤荷煙中鋤手分瀑泉灑作雨覆以老瓦如  
穹廬平明發視玉髯磔一夜怒長堪冰菹自親火候瀹

魚眼帶生毛入晴雲  
腕碧絲高壓涎滑  
萼脆響平欺辛螯  
瘳晚菘早韭各一時  
非時不到詩人脾  
何如此雋吐嗟  
辨庾郎處貧未為慣

詩散句原唐杜甫相攜行豆田秋花靄霏霏  
增宋楊

萬里道邊籬落半遮眼  
白白紅紅徧豆花  
唐張九齡

塲藿已成歲杜甫豆子雨已熟  
宋蘇軾秋霖暗豆

莢陸游宿雨飽豆莢  
豆莢雨中肥林景熙蟲響

豆花秋原唐杜甫南山豆苗早荒穢  
增許渾童子

遙迎種豆歸

溫庭筠

桑竹參差映豆花

宋陸游籩

實傍籬收豆莢

楊萬里

晚紫豆花初總角

元李孝

光豆遺晨壠茅齊白

明高啓白豆花開片雨餘

原

孟淑卿豆花雨過晚生涼

別錄原種植槐無蟲宜豆夏至前後下種上旬種則花

密莢多宜甲子丙子戊寅壬午及六月三卯日忌西南

風及申卯日肥地宜稀薄地宜密纔出便鋤草淨為佳

使葉蔽其根不畏旱獲宜晚莢赤莖蒼葉微黃方獲

增崔寔月令二月可種大豆又二月昏參夕杏花盛桑

椹赤可種大豆謂之上時四月時雨降可種大小豆

雜陰陽書大豆生於槐九十日秀秀後七十日熟豆生

於申壯於子長於壬老於丑死於寅惡於甲乙忌於卯

午丙丁齊民要術春大豆次植穀之後二月中旬為

上時一畝用子八升三月上旬為中時用子一斗四月上旬為下時

用子一斗二升歲宜晚者五六月亦得然稍晚稍加種子地不

求熟秋鋒之地即摘種地刈欲晚此不零落必須耒



下種欲深故豆性強苗深則及澤鋒耩各一鋤不過再葉落盡然後刈

葉不盡則難治刈訖則速耕大豆怕雨秋不耕則無澤種芡者用麥底一畝

用子三升先漫散訖犁細淺耨而勞之旱則糞堅葉落稀則苗莖不高

深則上厚不生若澤多者先深耕訖逆坐擲豆然後勞之澤少則否

為其泥鬱不生九月中候近地葉有黃落者速刈之葉少不黃必泥鬱刈

不速逢風則葉落盡遇雨澤爛不成汜勝之書曰大豆保歲易為宜古

之所以備凶年也謹計家口數種大豆率人五畝此田

之本也三月榆莢時有雨高田可種大豆土和無塊畝

五升土不和則益之種大豆夏至後二十日尚可種戴  
甲而生不用深耕大豆須勻而稀豆花憎見日見日則  
黃爛而根焦也 穫豆之法莢黑而莖蒼輒收無疑其  
實將落反失之故曰豆熟於場於場穫豆即青莢在上  
黑莢在下 汜勝之區種大豆法坎方深各六寸相去  
二尺一畝得千六百八十坎其坎成取美糞一升合坎  
中土攪和以內坎中臨種沃之坎三升水坎內豆三粒  
覆上土勿厚以掌抑之令種與土相親一畝用種一升

用糞十六石八斗豆生五六葉鋤之旱者溉之坎三升  
水丁夫一人可治五畝至秋收一畝中十六石 農政  
全書種大豆鋤成行壟春穴下種早者二月種四月可  
食名曰梅豆 吳下田家志種豆宜甲子乙丑壬申丙  
子戊寅壬午壬寅 原服食博物志人食豆三年則身  
重行動難 左慈荒年法用大豆粒細調勻者生熟按  
之令有光暖徹豆心內先日不食以冷水頓服訖一切  
魚肉菜果不得復食渴飲冷水初小困十日後體力壯

健不思食

抱朴子相國張文蔚莊內有鼠狼穴養四

子為蛇所吞鼠狼雌雄情切乃於穴外坌土壅穴俟蛇  
出頭度其回轉不便當腰咬斷而劈腹銜出四子尚有  
氣寘於穴外銜豆葉嚼而敷之皆活後人以豆葉治蛇  
咬蓋本於此  
延年祕錄服大豆令人長肌膚益顏色  
填骨髓加氣力補虛能食不過兩劑大豆五升如作醬  
法取黃搗末以猪肪煉膏和丸梧子大每服五十丸至  
百丸溫酒下神驗祕方也肥人忌服  
輟耕錄黃山谷

煮豆帖云煮黑豆法確豆一升按莎極淨用貫衆一斤細剉如骰子同豆斟酌水多少慢火煮豆香熟日乾之翻覆令展盡餘汁簸取黑豆去貫衆空心日啗五七粒食百草木枝葉皆有味可飽也 荆湖近事陶華以鹽

煮黑豆常食之云能補腎蓋豆乃腎之穀其形類腎黑色通腎引之以鹽所以妙也 李守愚侵晨并華水吞黑豆五七粒謂之五臟穀至老視聽不衰 製用六月六日以洗淨大黃豆煮熟取出候冷以麪為衣攤於席

上以衣蓋之又用青蒿煨一七取出曬乾搓去麩黃入缸煎紫蘇鹽湯候冷浸豆與水平每豆一斤用鹽六兩浸過一夜取出和食香拌勻裝淨罈內令日曬四五日從新搜過一次再曬再搜四五次用

附錄  
原魯豆

原魯豆

本草云魯乃自生稻名此豆野生故名

一名螢豆一名螢菽一名

治螢一名麻豆一名驢豆黑豆中最細者即黑小豆也野生今下地亦種之小科細粒葉如葛霜後熟可蒸食

甘溫無毒炒焦黑熱投酒中治產後冷血

赤小豆

按廣雅云小豆荅也統而名之也齊民要術云小豆有綠赤白三種譚豆豉豆蠶豆

留豆亦其類也今照本草分列於後

原赤小豆一名赤豆一名紅豆處處種之夏至後下種  
苗高尺許葉本大末尖至秋開花淡銀褐色有腐氣莢  
長二三寸比綠豆莢稍大色微白帶紅三青二黃時即  
收之可煮可炒可粥飯可作麪食餚並良久服則津血  
滲洩令人肌瘦身重合魚鮓食成消渴其稍大而鮮紅

淡紅者止可食用色赤黯而粒緊小者入藥甘酸平無  
毒心之穀也性下行能入陰分行津液利小便消脹除  
腫止吐治下痢腸澼解酒病除寒熱排膿散血通乳汁  
下胞衣利產難水氣脚氣最為急需花名赤腐婢解酒  
毒明目下水治小兒丹毒葉去煩熱煮食明目

彙考原吳志趙達傳達治九宮一算之術使人取小豆  
數升播之席上立處其數驗覆果信 晉書郭璞傳璞

至廬江愛主人婢無由而得乃取小豆三升繞主人舍



散之主人晨見赤衣人數千圍其家就視則滅甚惡之  
請璞為卦璞曰君家不宜畜此婢可於東南三十里賣  
之慎勿爭價則此祟可除主人從之

歲時雜記

共工氏有不才子以冬至日死為疫鬼畏赤豆故是日作赤  
豆粥厭之 田家五行十二月二十五日夜煮赤豆粥  
大小人口皆食之在外之人亦留分以俟其歸謂之口  
數粥亦驅瘟鬼之意

別錄增齊民要術赤豆三月種六月旋摘遲者四月種

亦可宜稀稠得所太密不實

## 綠豆

原綠豆

本草云綠以色名也舊作菉非

圓小者佳大者名植豆功用頗

同四月下種苗高尺許葉小而有毛至秋開小白花莢長二三寸比赤豆莢微小有二種粒麤而色鮮者為官綠又名明綠皮薄粉多粒小而色暗者為油綠又名灰綠皮厚粉少早種者名摘綠可頻摘也遲種者名拔綠一拔而已其用甚廣可作豆粥豆飯豆酒燭食炒食水

泡磨為粉澄瀘作餌蒸糕盪皮壓索為食中要物亦可  
喂牲畜真濟世良穀也性甘寒無毒肉平皮寒用宜連  
皮解金石砒霜草木一切諸毒生研新汲水服反樞子  
殺害人合鯉魚鮓食久則令人肝黃成渴病花及芽解  
酒毒英治赤痢

彙考增湘山野錄真宗深念稼穡聞占城稻耐旱西天  
菽豆子多而粒大各遣使以珍貨求其種占城得種二  
十石至今在處播之西天中印土得菽豆種二石不知

今之菜豆是否始植於後苑秋成日宣近臣嘗之仍賜  
占稻及西天菜豆御詩 孫公談圃 張文定嘗苦脚疾  
無藥可療一日遊相國寺有賣藥者得菜豆兩粒服之  
遂愈 原唐公之夔號抱一西粵人也言其地無綠豆  
每承舍入京包中止帶斗餘多則至某江輒遇風浪不  
能渡到彼中比於藥物凡患時疾者用等秤買一家煮  
豆香味四達兩鄰對門患病入聞其氣輒愈

別錄原種植綠豆宜刈了麻地上種之太早不生莢若

其年李不蛀則豆有收忌卯日下種 增種樹書種菜

豆地宜瘦四月種六月收子再種八月又收 原製用

豆蘖先取濕沙納甕器中以綠豆勻撒其上如種藝法  
深桶覆蔽室中勿令見風日一次掬水灑透俟其苗長  
可尺許摘取蟹眼湯綽過以料蘖供之赤豆亦可然不  
如綠豆之佳

白豆

原白豆一名飯豆小豆之白者也亦有土黃色者大如

綠豆而差長粥飯皆可用四五月種苗葉似赤小豆而微尖嫩者可作菜亦可生食味甘平調中補五臟暖腸胃腎之穀也腎病宜食浙東一種味更勝作醬作腐極佳北方水白豆相似而不及

增本草一種菘豆葉如

大豆亦其類也

### 豌豆

原豌豆

本草綱目云其苗柔弱宛宛故得豌豆名豌豆舊作豎音剡

一名胡豆

本草經云張騫

使外國得

一名戎菽

爾雅云戎菽謂之荏菽注云即胡豆管子云桓公伐山戎以戎菽餉

布於天下 一名畢豆

崔實月令作躡豆廣雅作躡豆又名曰留豆

一名青小豆一

名青斑豆一名麻累

本草綱目云嫩時青色老則斑麻故有諸名

一名田鵲

唐書云畢豆出田鵲地飲膳正要作回回豆即回鵲也

一名淮豆

農書云俗呼豌豆大者為淮豆

一名國豆

鄴中記云石勒改為國豆

種出西戎北土甚多八九月下

種亦有春種者蔓生有鬚葉似蒺藜葉兩兩相對嫩時

可食三四月開小花如蛾形淡紫色結莢形圓長寸許

子圓如藥丸嫩時可煮食老則可炒食可作麵食餛磨

粉麵甚白而細膩出西戎者大如杏仁百穀之中最為

先熟又耐久藏宜多種可和醬作澡豆去黥黥令面光  
澤亦可喂馬性甘平無毒調營衛平氣益中治消渴淡  
煮食之良煮食殺鬼毒心病下乳汁研末塗癰腫痘瘡  
集藻狀增唐陸贄請依京兆所請折納事狀京兆府先  
奏當管蟲食豌豆全然不收請據數折納大豆奉勅宜  
依度支續奏稱據時估豌豆每斗七十價已上大豆每  
斗三十價已下京兆府所請將大豆替豌豆望令各據  
估計錢數折納則冀免損官司者求瘼救災國之令典



求瘼在知其所患救災在恤其所無只如螟螣為殃豌豆全損檢覆若非虛謬地稅固合免徵直道而行大體斯在司府折納充數已為尅下從權度支準估計錢乃是幸災規利所得無幾其傷實多傷風得財非謂理道且豌豆為物入用甚微舊例所支唯充畜料準數廻給大豆諸司誰曰不然計價剩徵義將安在理無所據事不可從望依前勅處分未審可否

別錄增農政全書玄扈先生曰豌豆與蠶豆各種蠶豆

之利倍於豌豆十倍其耐陳則一也

蠶豆

以下四種原列蔬譜  
今從本草移入於此

原蠶豆一名胡豆

本草綱目云豆莢狀如老蠶故名王  
禎農書謂其蠶時始熟故名亦通吳

瑞本草以此為豌豆誤矣此種豆亦自西胡來雖與豌豆同名同時種而形性迥別太平御覽云張騫使外國得胡豆種歸指此也今蜀人呼此為胡豆而豌豆不復名胡豆矣

南北皆有蜀中尤多

八月下種冬生嫩苗可茹莖方而肥中空葉狀如匙頭圓而下尖面綠背白柔厚一枝三葉二月開花如蛾狀紫白色結莢連綴蜀人收其子備荒性甘微辛平無毒

快胃和臟腑解酒毒誤吞金銀等物者用之皆效

集藻七言律詩增宋楊萬里招陳益之李兼濟二主管  
小酌益之指蠶豆云未有賦者戲作七言翠英中排淺  
碧珠甘欺崖蜜軟欺酥沙瓶新熟西湖水漆櫚分嘗曉  
露腴味與櫻梅三益友名因蠶繭一絲絢老夫稼圃方  
雙學譜入詩中當稼書

別錄增農桑通訣蠶豆百穀之中最為先登 農政全  
書玄扈先生曰蠶豆種花田中冬天不拔花枯用以拒

霜至清明後拔之 蠶豆八月初種臘月宜厚壅之此種極救農家之急且蝗所不食

### 豇豆

原豇豆一名降鰾

音絳雙本草綱目云此豆紅色居多英必雙生故有豇降鰾之名廣雅指

為胡豆誤矣

處處有之穀雨前後下種者六月子便可種一

年可兩收四月種者七八月收一種蔓長丈餘一種蔓短懸架則蕃鋪地則不甚旺宜灰壅其葉俱本大末尖嫩時可茹其花有紅白二色英有白紅紫赤斑駁數色

長者至二尺生必兩兩並垂有習坎之義子微曲如人  
腎形所謂豆為腎穀者宜以此當之性甘鹹無毒理中  
益氣補腎健胃和五臟調營衛生精髓止消渴吐逆泄  
痢小便數與諸疾無禁但水腫忌補腎不宜多食此豆  
嫩時充菜老則收子可穀可果可菜取用最多豆中上  
品也

別錄原本草昔盧廉夫教人補腎氣每日空心煮豇豆  
入少鹽食之大有益 袖珍方中鼠莽毒者以豇豆汁

飲即解欲試者先刈鼠莽苗以汁漬之便根爛不生此則物理然也

附黎豆錄

原黎豆一名狸豆一名黎沙一名獵沙見古注其大者名

虎豆亦名虎沙

爾雅云攝虎壘注云今虎豆江東呼為攝攝本草綱目云爾雅虎壘即狸豆也

古人謂藤為壘後人訛壘為狸矣又云黎黑色也此豆其老則黑色有毛露筋如虎狸指爪其子亦有點如虎狸之斑黃之汁野生山中入亦有種之者三月下種生黑故有諸名

蔓葉如豇豆但文理偏斜六七月開花成簇紫色狀如

扁豆花一枝結莢十餘長三四寸大如拇指有白茸毛  
老則黑而露筋宛如乾熊指爪之狀其子大如刀豆淡  
紫色有斑點如狸文煮去黑汁同猪雞肉再煮食味乃  
佳

附錄馬豆

增古今注馬豆一名馬沙似虎豆而小實大如指亦可  
食也

彙考增雲仙散錄品物類聚曰白馬豆食之齒齲號國

夫人厨吏鄧連以洗豆皮作靈沙臙供翠鴛堂

### 菹豆

原菹豆一名沿籬豆一名蛾眉豆

本草云菹本作扁莢形扁也沿籬蔓延也

蛾眉象豆脊白路之形也

二月種蔓生人家多種之籬邊或以竹木

架起每又三枝一居頂二對生一枝三葉亦一居頂二對生葉大如杯圓而有尖花有紫白二色狀如小蛾有翅尾形莢生花下花卸而莢現及老長寸餘有青白二色形凡十餘樣或長或團或如龍爪虎爪或如豬耳刀



鑰種種不同皆纍纍成枝一枝十餘莢成穗白露後實

更繁衍子有黑白赤斑四色

圖經本草云黑者名鵲豆蓋以其黑間有白道如鵲

羽也每莢子或一或二三一種莢硬不堪食惟豆子麤圓

而色白者可入藥微炒用氣味甘微溫無毒和中下氣

消暑暖脾胃除濕熱止消渴解酒毒河豚魚毒一切草

木毒

集藻增明王伯稠涼生豆花豆花初放晚涼淒碧葉陰

中絡緯嘯貪與鄰翁棚底話不知新月照清溪

別錄原月令廣義芒種前扁豆開花主水 種植清明  
下種以草灰蓋之不用土覆芽長分栽搭棚引上 增  
農政全書玄扈先生曰以口向上種之粒粒出若扁種  
十不出一蓋豆瓣重頂土不起故爛

### 刀豆

原刀豆一名挾劍豆

拾遺記云樂浪之東有融澤有挾劍豆其英形似人挾劍橫斜而生

此即人家多種之蔓引一二丈葉如豇豆葉而稍長大五  
六七月開紫花結莢長者近尺微似阜莢扁而劍脊三

稜嫩青煮食醬醃蜜煎皆佳老則微黑子大如拇指頂  
淡紅色同雞猪肉煮食甚美氣味甘平無毒溫中下氣  
利腸止飢逆益腎補元

別錄原本草綱目一人病後飢逆不止聲聞鄰家或令  
取刀豆燒存性白湯調服二錢即止此亦取其下氣歸  
元而逆自止也 種植將地鋤鬆深半尺熟糞拌勻清  
明時先用布濕微水潤豆令脹將見芽鋤前土作穴每  
穴一粒側放入不可深此豆體重深則難出上用鋸末

拌土薄蓋一層一云用草灰日日澆令濕俟生蔓竹木架起

大靈豆

增貴耳錄大靈豆華山陳搏有靈豆服一粒四十九日不饑筋力如故顏色若嬰兒世罕得服之者

木豆

增交州記木豆出徐僮間子美似烏頭大葉似柳一年種數年採

靈光豆

增杜陽雜編 大歷中日林國獻靈光豆大小類中國之  
萊豆其色紅而光芒長數尺本國人呼為詰多珠和石  
上菖蒲葉煮之即大如鵝卵其中純紫稱之可重一斤  
已上啖之香美無比數日不復言饑渴

佛豆

增益部方物畧記 佛豆粒甚大而堅農夫不甚種唯圃  
中蒔以為利以鹽漬食之小兒所嗜

集藻贊增宋宋祁佛豆贊豐粒茂苗豆別一類秋種春

斂農不常時

脂麻

原脂麻

俗作芝麻者非

一名油麻一名胡麻

夢溪筆談云胡麻直是今油麻張騫

始自大宛得油麻之種故名胡麻以別中國之大麻也本草云油麻脂麻謂其多脂油也

一名巨勝

本草云巨勝即胡麻之角巨如方勝者

一名方莖

以莖名

一名狗蟲

以形名

一

名藤弘

見廣雅本草云藤弘者弘亦巨也

一名交麻

杜寶拾遺記云隋大業中改為交麻

陶弘景曰胡麻八穀之中惟此為良李時珍曰脂麻有

早晚二種黑白赤三色莖皆方高者三四尺葉光澤有本團而末銳者有本團而末分三了如鴨掌形者葛洪謂一葉兩尖為巨勝蓋不知烏麻白麻皆有二種葉也秋開白花似牽牛花而微小亦有帶紫艷者節節生枝結角長者寸許四稜六稜者房小而子少七稜八稜者房大而子多皆隨地肥瘠蘇恭謂四稜為胡麻八稜為巨勝謂其房大勝諸麻也其枝四散者角繁子多一莖獨上者角稀子少取油以白者為勝可以烹煎可以然

點服食以黑者為良胡地者子肥大其紋鵲其色紫黑  
取油亦多尤妙其色黑入腎能潤燥也赤者狀如老茄  
子錢乙治痘瘡變黑歸腎用赤脂麻煎湯送百祥丸取  
其解毒耳

彙考增拾遺記樂浪之東有背明之國宜種百穀有通  
明麻食者夜行不持燭是苴勝也食之延壽後天而老  
原神仙傳魯女生長樂人初餌胡麻及朮絕穀八十  
餘年日少壯色如桃花日能行三百里走及麋鹿增



雞肋篇胡麻俗呼芝麻言其性有八拘謂雨暘時薄收大旱方大熟開花向下結子向上炒焦壓榨才得生油膏車則滑鑽鍼乃澀也 本草俗傳胡麻須夫婦同種

則茂盛故本事詩云胡麻好種無人種合是歸時底不歸 原天台志劉晨阮肇入天台採藥失道食盡見桃實食之覺身輕行數里至溪許持杯取水見一杯流出有胡麻飯溪邊二女子笑曰劉阮二郎捉向所失流杯來便迎歸作食既出無復相識至家子孫已七世矣

集藻賦增

宋蘇軾服胡麻賦并序始余嘗服伏苓久之

良有益也

夢道士謂余伏苓燥當雜胡麻食之夢中問

道士何者為胡麻道士言脂麻是也既而讀本草云胡

麻一名狗虱

一名方莖黑者為巨勝其油正可作食則

胡麻之為脂麻信矣又云性與伏苓相宜於是始異斯

夢方將以其說食之而子由賦伏苓以示余乃作服胡

麻賦以答之世間人聞服脂麻以致神仙必大笑求胡

麻而不可得則必求山苗野草之實以當之此古所謂

道在邇而求諸遠者歟其詞曰我夢羽人傾而長兮惠  
而告我藥之良兮喬松千尺老不僵兮流膏入土龜蛇  
藏兮得而食之壽莫量兮於此有草衆所嘗兮狀如狗  
蝨其莖方兮夜炊晝曝久乃臧兮伏苓為君此其相兮  
我興發書若合符兮乃淪乃烝甘且腴兮補填骨髓流  
髮膚兮是身如雲我何居兮長生不死道之餘兮神藥  
如蓬生爾廬兮世人不信空自劬兮搜抉異物出怪迂  
兮槁死空山固其所兮至陽赫赫發自坤兮至陰肅肅

躋於乾兮寂然反照珠在淵兮沃之不滅又不燔兮長  
虹流電光燭天兮嗟此區區何與於其間兮磨之膏油  
火之所傳而已耶

元戴表元胡麻賦

六月亢旱百稼

槁乾有物沃然秀於中田是為胡麻外白中玄嘻微心  
之良苦徵日御而周旋朝舒翹以東嚮夕偃媚而西遷  
若饑迎之有節閱旦旦而不愆有一儒者睹而異之曰  
是物其有識可比義於戎葵惟太陽之委照疇一物之  
得遺彼茫然以自遂有得氣而不知獨輸勤於畎畝致

展轉於遐暉迹其華粲粲以淡成幹亭亭而直致陰回  
翔以蓋屬膏湛渟而珠媚疑本質之過清常凝溫而抱  
粹庸遇暎以不傷表孤妍於衆悴且其比本近仁嚮明  
近智蹈約而不移近信在困而能恭近義故論胡麻者  
以為君子之道四宜乎以爾登良醫之筐衍依飛仙之  
服餌也

詩散句原唐王維

御羹和石髓香飯進胡麻

增宋梅

堯臣傍枝延扶疎脩英繁索韜

胡麻養氣血種以督

兒曹

原明馮琦居然在玄圃不必飯胡麻

增唐曹

唐白羊成隊難收拾吃盡溪邊巨勝花

宋陸游胡麻

刈罷下麴初引水家家灌晚蔬欲曬胡麻愁屢雨

別錄原種植須肥地荒地亦可但多加糞二三月為上

時四月上旬為中時五月上旬為下時望前種實多而

成望後種子少多糝每畝二升取沙土中拌和之則入

地勻須多種宜甲子壬申丙子壬午及六月三卯日忌

南風及辛亥寅未日

收割鋤三四徧逾多逾妙頻鋤

草淨簡熟者先獲束欲小大則難乾五六束一攢斜倚之使風得入候口開以小杖微打令子出仍攢之三日一打四五徧乃淨曬乾收藏服食抱朴子云用上黨

胡麻三斗淘淨甑蒸令氣徧日乾以水淘去沫再蒸如此九度以湯脫去皮簸淨炒香為末白蜜棗膏丸彈子大每服溫酒化下一丸日三忌毒魚狗肉生菜服至百日除一切痼疾一年身面光澤不饑二年白髮返黑三年齒落更生四年水火不能害五年行及奔馬若欲下

之飲葵菜汁 孫真人云用胡麻三升去黃褐者蒸三十徧微炒香為末入白蜜三升杵三百下丸桐子大每旦服五十丸人過四十以上久服明目洞視腸柔如筋  
取用 漬汁和麴至勒滑人身生肉丁者擦之即愈七  
月七日采烏麻花最上頭者陰乾為末烏麻油漬之眉  
毛不生者日塗之即生又生禿髮 稽入米倉內米不  
蛙燒灰入點痣及去惡肉方中用除夜撒之房臥內外  
云可避邪又生脂麻單條者名霸王鞭豎卧房前亦云



可祛鬼 葉湯浸良久涎出稠黃色婦人用梳頭沐髮  
去風 家塾事親油生笮者良有潤燥解毒止痛消腫  
之功蒸炒者止可食用及然點不堪入藥入藥以烏麻  
油為上白麻油次之須自笮者可用市者恐偽臘月油  
久放不壞點燈照蠶辟蟲熬膏藥極效搽婦人頭髮黑  
光不臭不生蟻虱 麻餅笮去油麻滓也亦名麻粃可  
食荒歲人以救饑入鹽作醬甚滑膩又可養魚肥田周  
禮堅強用黃亦此義也 增好事集以胡麻麴啖犬則

光黑而駿使獵必大獲又可得三十歲  
物類相感志

芝麻其燒煙熏紙被不作聲


附錄青蘘

原青蘘一名夢神一名胡麻巨勝苗也一作葉服食家  
作菜用其法秋間取巨勝子種肥地畦中如種菜法苗  
出鋤令無草乾即灌水采食滑美如葵

附錄亞麻

增本草亞麻一名鴉麻一名壁虱胡麻蘇頌曰出兖州

威勝軍苗葉俱青花白色李時珍曰陝西人亦種之其實亦可榨油然燈氣惡不堪食



御定佩文齋廣羣芳譜卷十

欽定四庫全書

子部

御定廣羣芳譜卷十二

詳校官庶吉士<sub>臣</sub>汪彥博

員外郎<sub>臣</sub>牛稔文覆勘

覆校官庶吉士<sub>臣</sub>侍朝

校對官中書<sub>臣</sub>汪日章

謄錄監生<sub>臣</sub>王元弼

欽定四庫全書

御定佩文齋廣羣芳譜卷十一

桑麻譜

桑

原桑東方自然神木之名其字象形蠶所食也

見徐鍇說文通

釋

皮裂幹疎葉面深綠光澤多刻缺方書稱桑之功最

神在人資用尤衆其種類甚多不可徧舉世所名者荆與魯也荆桑多椹葉薄而尖邊有瓣凡枝幹條葉堅勁

者皆荆類也魯桑少椹葉圓厚而多津凡枝幹條葉豐  
腴者皆魯類也荆類根固而心實能久宜為樹魯類根  
不固心虛不能久宜為地桑荆葉不如魯之盛當以魯  
接荆則久而又茂魯為地桑有壓條法傳轉無窮是亦  
可以久遠者也荆桑飼蠶其絲堅韌中紗羅用魯桑宜  
飼大蠶荆桑宜飼小蠶見王禎農桑通訣此外又有槲桑爾雅云女桑  
桑棧桑注云今俗桑樹小而條長者曰女桑樹疏云女桑一名槲桑壓桑爾雅云壓桑山桑注云似桑材  
中作弓及車轆疏禹貢厥篚壓絲是也增本草李時  
云山桑一名壓桑

珍曰桑有數種有白桑葉大如掌而厚雞桑葉花而薄  
子桑先樁而後葉山桑葉尖而長以子種者不若壓條  
而分者 原桑生黃衣謂之金桑木將槁蠶食必病樹  
下每年耕用糞則葉肥嫩構接則葉大桑白皮利小水  
肺中有水氣及肺火有餘者用之葉多積荒年可濟飢  
亦可喂猪羊馬蠶事畢令人採取曬乾收貯備用

彙考增易否卦繫于苞桑疏苞本也凡物繫於桑之苞  
本則牢固也又桑之為物其根衆也衆則牢固之義

書禹貢桑土既蠶是降丘宅土傳大水去民下丘居平  
土就桑蠶集傳桑土宜桑之土既蠶者可以養蠶也蠶  
性惡濕故水退而後可蠶然九州皆賴其利而獨於充  
言之者充地宜桑後世之濮上桑間猶可驗也 厥貢  
漆絲傳地宜漆林又宜桑蠶 厥篚檿絲傳檿桑蠶絲  
中琴瑟絃疏檿絲是蠶食檿桑所得絲韌中琴瑟弦也  
書傳成王之時有三苗貫桑葉而生同為一穗其大  
盈車長幾充箱民得而上諸成王 詩鄘風降觀于桑



傳地勢宜蠶可以居民 靈雨既零命彼倌人星言夙

駕稅于桑田集傳言方春時雨既降而農桑之務作文

公於是命主駕者晨起駕車急往而勞勸之 衛風桑

之未落其葉沃若傳桑女功之所起沃若猶沃沃然

桑之落矣其黃而隕 魏風彼汾一方言采其桑箋采

桑親蠶事也 原唐風肅肅鵲行集于苞桑 曹風鴈

鳩在桑其子七兮 增豳風女執懿筐遵彼微行爰求

柔桑疏柔桑穉桑也蠶始生宜穉桑 蠶月條桑取彼

斧斨以伐遠揚猗彼女桑傳遠枝遠也揚條揚也角而東之曰猗女桑柔桑也疏條其桑而采之謂斬條於地就地采之也猗束彼女桑而采之謂柔穉之桑不枝落者以繩猗束而采之也 小雅隰桑有阿其葉有難傳

阿然美貌難然盛貌有以利人也疏言隰中之桑枝條甚阿然而長美其葉則甚難然而茂盛其下可以庇陰人往息者得其涼也 隰桑有阿其葉有沃傳沃柔也隰桑有阿其葉有幽傳幽黑也疏阿那是枝葉條垂

之狀故為美貌難為葉之茂沃言葉之柔幽是葉之色  
言桑葉茂盛而柔輒則其色純黑故三章各言其一也  
樵彼桑薪印烘于燂傳印我也烘燎也燂炷竈也桑  
薪宜以養人者也疏有人樵取於彼桑木之薪不以炊  
爨云我用之燎於燂竈炷物而已桑薪薪之善者也宜  
以炊爨而養人今不以炊爨反燎於燂竈失其所也  
大雅苑彼桑柔其下侯甸傳苑茂貌甸言陰均也箋桑  
之柔濡其葉苑然茂盛謂蠶始生時也人庇蔭其下者

均得其所疏苑然而茂者彼桑也其葉稚而柔濡故苑然茂盛於此之時人息其下維均得蔭皆無暑熱之患

禮記月令季春之月命野虞毋伐桑柘注愛蠶食也

野虞謂主田及山林之官 鳴鳩拂其羽戴勝降于桑

蠶將生之候也戴勝織紵之鳥是時恒在桑 具曲

植遽筐注時所以養蠶器也曲簿也植槌也 后妃齋

戒親東鄉躬桑禁婦女毋觀省婦使以勸蠶事注后妃

親採桑示帥先天下也東鄉者鄉時氣也是明其不常

留養蠶也留養者所卜夫人與世婦婦謂世婦及諸臣之妻也內宰職曰仲春詔后帥內外命婦始蠶于北郊女外內子女也夏小正曰妾子始蠶執養宮事毋觀去容飾也婦使縫線組紉之事 蠶事既登分繭稱絲效功以共郊廟之服毋有敢惰注登成也勅往蠶者蠶畢將課功以勸戒之 季夏之月蠶事畢后妃獻繭乃收繭稅以桑為均貴賤長幼如一以給郊廟之服疏后妃獻繭者謂后妃受內命婦之獻繭乃收繭稅者謂既受

內命婦獻繭及収外命婦繭之賦稅以桑為均者言收  
稅之時以受桑多少為賦之均齊桑多則賦多桑少則  
賦少貴賤長幼如一者貴謂公卿大夫之妻賤謂士之  
妻長幼謂婦老幼無問貴賤長少出之時齊同如一皆  
以近郊之稅十而稅一也所稅之物以供給天子郊廟  
之服內則射人以桑弧蓬矢六射天地四方疏桑眾  
木之本祭義古者天子諸侯必有公桑蠶室近川而  
為之築宮仞有三尺棘牆而外閉之及大昕之朝君皮

弁素積卜三宮之夫人世婦之吉者使入蠶于蠶室奉  
種浴于川桑于公桑風戾以食之疏公桑蠶室者謂官  
家之桑於處而築養蠶之室近川而為之者取其浴蠶  
種便也風戾以食之者戾乾也凌早采桑必帶露而濕  
蠶性惡濕故乾而食之

左傳宣子田於首山舍於翳

桑注翳桑桑之多蔭翳者

原孟子五畝之宅樹墻下

以桑

增

戰國策昔者堯見舜於草茅之中席隴畝而

蔭庇桑陰桑陰移而受天下

史記殷本紀

帝太戊立

伊陟為相毫有祥桑穀共生於朝一暮大拱帝太戊懼  
問伊陟伊陟曰臣聞妖不勝德帝之政其有闕歟帝其  
脩德太戊從之而祥桑枯死

貨殖傳齊魯千畝桑麻

與千戶侯等

原漢書文帝紀

十三年春二月甲寅詔

曰朕親率天下農耕以供染盛皇后親桑以奉祭服其  
具禮儀注師古曰令立耕桑之禮制也

景帝紀二年

夏四月詔曰朕親耕后親桑以奉宗廟染盛祭服為天

下先

增漢書食貨志還廬樹桑

元后傳太后幸繭



館率皇后及列夫人桑

後漢書禮儀志皇后帥公卿

諸侯夫人蠶祠先蠶禮以少牢注漢舊儀曰春桑生而

皇后親桑於苑中蠶室養蠶千簿以上祠以中牢羊豕

羣臣妾從桑還獻於鹵觀皆賜從桑者樂

襄楷傳楷

上書曰閭宮中立黃老浮屠之祠浮屠不三宿桑下不

欲久生恩愛精之至也注言浮屠之人寄桑下者不經

三宿便即移去示無愛戀之心也

原後漢書張堪傳

張堪拜漁陽太守百姓歌之曰桑無附枝麥秀兩歧張

君為政樂不可支

申屠蟠傳蟠絕迹於梁碭之間因

樹為屋自同傭人注謝承書曰居蓬萊之室依桑樹以

為棟也

增謝承後漢書汝南伊昆為陰縣功曹令新

到官問曰園中有桑以食蠶何如昆曰非初至所當務

原蜀志先主傳先主舍東南角籬下有桑樹生高五

丈餘遙望童童如小車蓋往來者皆怪其非凡或謂當

出貴人先主少時與宗中諸小兒戲於樹下戲言吾必

當乘此葆羽車蓋

增蜀志諸葛亮傳亮自表後主曰

成都有桑八百株薄田十五頃子弟衣食自有餘饒

龐統傳穎川司馬徽清雅有知人鑒龐統弱冠往見徽

徽采桑於樹上坐統在樹下共語自晝至夜徽甚異之

稱統當為南州士人之冠冕由是漸顯

晉書禮志武

帝太康六年使侍中成粲草定親蠶儀先蠶壇高一丈

方二丈為四出陛陛廣五尺在皇后採桑壇東南帷宮

外門之外而東南去帷宮十丈在蠶室西南桑林在其

東取列侯妻六人為蠶母蠶將生擇吉日皇后著十二

筭步搖依漢魏故事衣青衣乘油畫雲母安車駕六駟  
馬女尚書著貂蟬佩璽陪乘載筐鉤公主三夫人九嬪  
世婦諸太妃太夫人及縣鄉君郡公侯特進夫人外世  
婦命婦皆步搖衣青各載筐鉤從蠶先桑二日蠶宮生  
蠶著薄上桑日皇后未到太祝令質明以一太牢告祠  
謁者一人監祠祠畢徹饌班餘胙於從桑及奉祠者皇  
后至西郊升壇公主以下陪列壇東皇后東面躬桑採  
三條諸妃公主各採五條縣鄉君以下各採九條悉以

桑條授蠶母還蠶室

藝術傳淳于智有思義能易筮

善厭勝之術上黨鮑瑗家多喪病貧苦智為卦成謂瑗  
曰君安宅失宜故令君困君舍東北有大桑樹君徑至  
市入門數十步當有一人持荆馬鞭者便就買以懸此  
樹三年當暴得財瑗承言詣市果得馬鞭懸之三年後  
并得錢數十萬銅鐵器復二十餘萬於是致贍疾者亦  
愈

辰韓國傳辰韓俗饒蠶桑善作縑布

馮跋載記

跋勵意農桑勤心政事下書曰桑柘之益有生之本此

土少桑人未見其利可令百姓人植桑一百根柘二十根

原宋書禮志

孝武立觀后親桑循晉禮也

增南

齊書祥瑞志永明二年護軍府門外桑樹一株並有蠶絲綿被枝莖史臣按漢光武時有野蠶成繭百姓得以成衣服今則浮波幕樹其亦此之類乎

原南齊書孝

義傳韓係伯襄陽人也襄陽土俗鄰居種桑界上為誌係伯以桑枝蔭妨他地遷界上開數尺鄰畔隨復侵之係伯輒更改種久之鄰人慚愧還所侵地躬往謝之

增魏書食貨志諸初受田者男夫一人給田二十畝課

蔣餘種桑五十樹棗五株榆三根非桑之土一夫給一畝依法課蔣榆棗奴各依良限三年種畢不卑奪其不畢之地於桑榆地分雜蔣餘果及多種桑榆者不禁諸應還之田不得種桑榆棗果種者以違令論

原南史

齊本紀高帝舊宅在武進宅南有一桑樹擢本三丈橫出四枝狀似華蓋帝年數歲好戲其下從兄敬宗曰此樹為汝生也

增南史羅研傳

研為信安令故事置觀

農謁者圍桑度田勞擾百姓研請除其弊帝從之 新

羅國傳新羅土地肥美多桑麻作縑布 隋書禮儀志

後齊皇后親桑於桑壇備法駕服鞠衣乘重翟帥六宮

升桑壇東陞即御座女尚書執筐女主衣執鉤立壇下

皇后降自東陞執筐者處右執鉤者處左蠶母在後乃

躬桑三條訖升壇即御座內命婦以次就桑鞠衣五條

展衣七條祿衣九條以授蠶母還蠶室 皇后采桑則

服鳩衣 皇后之車三曰翟輅以採桑 命婦采桑齋



及采桑還則黃衣

食貨志河清三年每丁給永業二

十畝為桑田其中種桑五十根榆三根棗五根不在還受之限非此田者悉入還受之分

唐書憲宗本紀元

和七年四月詔民田晦樹桑

禮樂志皇后歲祀一季

春吉已享先蠶遂以親桑

賈循傳循母將葬宅有枯

桑一夕再生芝出北墉人以為瑞

南蠻傳永昌之西

野桑生石上其材上屈兩向而下植取以為弓不筋漆而利名曰瞑弓

宋史禮志

元祐八年宰臣奏積雨傷

蠶上曰朕宮中自蠶一簿欲知農桑之候久雨葉濕豈  
不有損乃命往天竺祈晴

食貨志太祖建隆時詔所

在長吏諭民有能廣植桑棗墾闢荒田者止輸舊租民  
伐桑棗為薪者罪之

熙寧元年中書議勸民栽桑帝

曰農桑衣食之本民不敢自力者正以州縣約以為貲  
升其戶等耳宜申條禁於是司農寺請立法先行之開  
封視可行頒於天下民種桑柘毋得增賦安肅廣信順  
安軍保州令民即其地植桑榆或所宜木因可限闕戎

馬官計其活茂多寡得差減在戶租數活不及數者罰  
責之補種

金史食貨志世宗大定十九年二月上如

春水見民桑多為牧畜嚙毀詔親王公主及勢要家牧  
畜有犯民桑者許所屬縣官立加懲斷

山海經宣山

上有桑大五十尺其枝四衢葉大尺赤理青華名之曰

帝女之桑 衡山多桑 東北海外赤水在圓丘南有

三桑木而無枝皆高百仞

穆天子傳甲寅天子作居

范宮以觀桑者乃飲於桑中天子命桑虞出

闕字

桑者用

禁暴民注不得令剗犯桑木

尚書考靈曜桑木者箕

星之精神木蟲食葉為文章人食之老翁為小童 原

春秋孔演圖孔子母徵在游於大塚之陂睡夢黑帝使

請往交語曰汝乳必於空桑覺則若有所感後生孔子

於空桑之中 韓非子子產相鄭開畝樹桑鄭人謗訾

增呂氏春秋伊尹之母居伊水之上孕夢有神告之

曰白出水而東走無顧明日視曰出水其鄰東走十里而顧其邑盡為水身因化為空桑有莘氏女子採桑得

嬰兒空桑之中獻之於君君令乳之命曰伊尹  
淮南

子蠨蠸一歲再收非不利也然而王法禁之者為其殘

桑也  
括地圖  
化民食桑三十七年化而自裹九年生

翼十年而死  
神異經  
東方有桑樹焉高八十丈敷張

自輔其葉長一丈廣六七尺其上自有蠶作繭長三尺

繅一繭得絲一斤  
原漢舊儀  
皇后躬桑始將一條執

筐受桑將三條女尚書跪曰可止執筐者以桑授蠶母

以桑適金室  
增列女傳  
魯秋胡子納妻五日而官於

陳後歸未至家見路傍有美婦方採桑秋胡悅之下車  
願托桑陰下婦人採桑不顧胡曰力田不如逢年採桑  
不如見郎今吾有金願與夫人而婦人不受胡乃歸母  
呼其婦乃即採桑者也數胡之罪而自投於河 齊宿  
瘤女東鄰採桑女也項有大瘤閔王遊至東都百姓盡  
觀宿瘤女採桑不顧王怪問之對曰受父母教採桑不  
受教觀王王曰此奇女悅而聘迎之 陳辨女者陳國  
採桑之女也晉大夫解君甫使於宋過陳遇之止而戲

之曰女為吾歌吾將舍女女乃歌曰墓門有棘斧以斯  
之夫也不良國人知之

崔豹古今注

邯鄲有美女姓

秦名羅敷為邑人王仁妻仁後為趙王家令羅敷出採  
桑於陌趙王登臺見而悅之因飲酒欲奪焉羅敷善彈  
箏作陌上桑之歌以自明

原神仙傳

麻姑語王方平

云接待以來已見東海三為桑田

增搜神記

有人遠

征家有一女馬一匹女思父乃戲馬曰爾能為我迎得  
父歸吾將嫁汝馬乃頓韁而去迎得父來後馬見女輒

怒父乃殺馬曝皮於庭女之皮所皮忽卷女而行父後  
於大桑樹枝間得女及皮盡化為蠶績樹上其繭厚大  
異常鄰婦取養之其收亦倍今世謂蠶為女兒古之遺  
語也 拾遺記少昊以金德王母曰皇娥處璇宮而夜  
織或乘桴木而晝遊經歷窮桑滄茫之浦時有神童容  
色絕俗稱為白帝之子即太白之精降乎水際與皇娥  
讌戲奏嬾媚之樂游漾忘歸窮桑者西海之濱有孤桑  
之樹直上千尋葉紅椹紫萬歲一實食之後天而老帝



子與皇娥並坐撫桐峰梓瑟皇娥倚瑟而清歌曰天清  
地曠浩茫茫萬象迴薄化無方滄天蕩蕩望滄滄乘桴  
輕漾著日傍當其何所至窮桑心知和樂悅未央白帝  
子答歌四維八埏眇難極驅光逐影窮水域璇宮夜靜  
當軒織桐峰文梓千尋直伐梓作器成琴瑟清歌流暢  
樂難極滄湄海浦來栖息及皇娥生少昊號曰窮桑氏  
亦曰桑丘氏至六國時桑邱子著陰陽書即其餘裔也  
原後燕錄遼初無桑慕容廆通於晉求種江南平川

之桑悉繇吳來

增述異記

空桑生大野山中為琴瑟

之最者空桑也

桓仲為江州刺史遣人周行廬山冀

覩靈異既陟崇巘有一湖周生桑樹有敗觚赤鱗魚使

者渴極欲往飲水赤鱗張鰓向之使者不敢飲

稽神

錄廬州軍吏蔡彥卿為拓臯鎮將暑夜坐鎮門外納涼

忽見道南桑林中有白衣婦人獨舞就視即滅明夜彥

卿扶杖先往伏草間久之婦人復出而舞即擊之墜地

乃白金一餅復掘地獲銀數千兩遂致富裕云

錄異

記李太尉德裕一旦有老叟謁門引五六輩舁巨木請謁焉閤者不能拒之公異而見之叟曰某家藏此桑寶三世矣某已耄矣感公之好奇搜異是以獻爾木中有奇寶若能者斲之必有所得洛邑有匠計其年齒且老或身已沒子孫亦當得其旨訣非洛匠無能斲之者也公如其言訪於洛下匠已殂矣其子應召而來睨而視之曰此可徐而斲之矣因解為二琵琶槽自然有白鴿羽翼爪足巨細畢備匠料之微失厚薄不中一鴿少其

翼公以形羽全者進之自留其一今猶在民間 洛陽

伽藍記昭儀寺佛堂前有桑樹一株直上五尺枝條橫  
遶柯葉傍布形如羽蓋覆高五尺又葉凡為五重每重  
葉生堪各異京師道俗謂之神桑 廣異記南方赤帝

女學道得仙居高陽嶧山桑樹上正月一日銜柴作巢  
至十五日成赤帝誘之不得以火焚之女即升天因名

帝女桑

鄴郡名錄杜勝宅以輓漆纏桑枝編為籬障

雨一過黑光照四面時通甫愛之欲以銅官第取不應

常新錄裴休得桑木根曰若作沉香想之更無異相  
雖對沉水香反作桑根想終不聞香氣諸相從心起

通鑑外紀西陵氏之女嫫祖為黃帝元妃始教民蠶桑  
治絲繭以供衣服而天下無殘瘠之患後世祀為先蠶  
兼明書今三四月間採桑之時見有小鳥灰色眼下  
正白俗呼白鵝鳥是也以其採桑時來故謂之桑鴈

俗呼小錄湖州以桑葉二十斤為一箇湧幢小品湖

州有章姓者豫占桑價占賤即畜至百餘斤二十年無

爽白手厚獲生計遂饒鼓樂賽謝以為常一日賽畢有一婦人矮而肥求齋卧地下不去其家內外醉飽厭之叱使去婦人曰我與汝曾祖母有舊連歲為汝應卜助生計一齋何吝匍匐入門蹴之忽不見且駭且疑佛堂忽有聲曾祖母牌已裂為二蓋祖母每好善見裸蟲必致暖處護其生俟生翼飛去乃已矮婦之祥或在於此以後卜吉而畜其價必相左家道耗云

燕山叢錄漢

昭烈宅在涿州樓桑村昭烈在民間所居有桑層陰如

樓因曰樓桑今尚在其下留題甚多

五雜俎涿州之

涑水道中有大桑樹高十餘丈蔭百畝云即昭烈舍前之桑也自漢及今千五百年矣而扶疎如故且其樞視常桑倍大土人珍之以相餽遺云

集藻贊增晉郭璞帝女桑贊爰有洪桑生濱淪潭厥圍五丈枝相交參園客是採帝女所蠶

原元王禎躬桑

贊有星天駟象匹神龍惟蠶辰生厥精冥通孕卵而出寓食桑中惟君立后毓德中宮既正母儀普師婦工建

茲繭館桑必以躬爰制祭祀郊廟是供

賦增魏繁欽桑賦上似華蓋紫極比形下象鳳闕萬栢

一楹叢枝互出乃錯乃并曄曄隆暑涼風自生微條纖  
繞隨風浮沉陽蜩鳴其南枝寒蟬噪其北陰秋氣忽其  
將來咸感節而悲吟玩庇蔭之厚惠情眷眷而愛深

晉陸機桑賦并序皇太子便坐蓋本將軍直廬也初世  
祖武皇帝為中壘將軍植桑一株世更二代年漸三紀  
扶疎豐衍抑有瑰異焉賦曰夫何佳樹之洪麗超托居



乎紫庭羅萬根以下洞矯千條而上征豈民黎之能植  
乃世武之所營故其形瑰族類體艷衆木黃中與理滋  
榮煩緝綠葉興而盈尺崇條蔓而層尋希太極以延峙  
映承明而廣臨革飛鴉之流響想鳴鳥之遺音惟歷數  
之有紀恒依物以表德豈神明之所相將我皇之先識  
誇百世而勿翦超長年以永植

傅咸桑樹賦并序世  
祖昔為中壘將軍於直廬種桑一株迄今三十餘年甚  
茂盛不衰皇太子入朝以此廬為便坐賦曰伊茲樹之

僥倖蒙生生之渥惠降皇躬以斯植遂弘茂於聖世厥  
茂伊何其大連尋修柯遠揚洪條梢樛布繁枝之沃若  
播密葉以垂陰蔭華寓而作涼清隆暑之難任以厥樹  
之巨偉登九日於朝陽且積小以高大生合抱於毫芒  
猶帝道之將升亦累德以彌光湯躬禱於斯林用獲雨  
而興商惟皇晉之基命爰於斯而發祥從皇儲於斯館  
物無改於平生心惻切以興思思有感於聖明步徬徨  
以周覽庶髡歸於儀刑

潘尼桑樹賦

從明儲以省膳

憩便房以偃息觀茲樹之特瑋感先皇之攸植蔚蕭森  
以四射邈洪榮而端直爾乃徘徊周覽俯仰逍遙俛睨  
靈根上眺修條洞芳泉於九壤含溢露於清霄倚增城  
之飛觀拂綺窓之疏寮下迢遞以極望上扶疎而參差  
匪衆鳥之攸萃相鳳鸞之羽儀理有微而至顯道有隱  
而應期豈皇晉之禎瑞兆先見而啓茲起尋抱於纖毫  
崇萬簣於始基原王禎親蠶賦惟蠶有功萬世歸美  
廣物產之貨貲作人生之衣被仲春之月天子詔后以

躬桑大昕之朝內宰告期而命祀於是詣靈壇降寶殿  
翠障夾乎道周鳳輦翔於畿甸順春氣於東方朝先蠶  
於北面具夫青縹之服侑以芳馨之薦當其疊承寵命  
適對韶光擇世婦於卜吉受鞠衣於明堂崇開禁館始  
入公桑援條有三聽女尚書之勸止執筐不再受宮夫  
人之是將體之以坤儀之柔順視之以母道之慈良破  
蟻以來庶養至於千簿獻繭之後諒化被於多方

五言古詩增漢樂府陌上桑日出東南隅照我秦氏樓

秦氏有好女自名為羅敷羅敷善採桑採桑城南隅青  
絲為籠系桂枝為籠鉤頭上倭墮髻耳中明月珠綰綺  
為下裙紫綺為上襦行者見羅敷下擔持髭鬚少年見  
羅敷脫帽著幘頭耕者忘其犁鋤者忘其鋤來歸相怒  
怨但坐觀羅敷使君從南來五馬立踟躕使君遣吏往  
問是誰家妹秦氏有好女自名為羅敷羅敷年幾何二  
十尚不足十五頗有餘使君謝羅敷寧可共載不羅敷  
前致辭使君一何愚使君自有婦羅敷自有夫東方千

餘騎夫壻居上頭何用識夫壻白馬從驪駒青絲繫馬  
尾黃金絡馬頭腰中鹿盧劍可直千萬餘十五府小史  
二十朝大夫三十侍中郎四十專城居為人潔白皙鬚  
鬚頗有鬚盈盈公府步冉冉府中趨坐中數千人皆言  
夫壻殊 晉樂府採桑度 蠶生春三月春桑正含綠女  
兒採春桑歌吹當春曲 繫條採春桑採葉何紛紛採  
桑不裝鈎牽壞紫羅裙 採桑盛陽月綠葉何翩翩攀  
條上樹表牽壞紫羅襦 陶潛擬古種桑長江邊三年

望當採枝條始欲茂忽值山河改柯葉自摧折根枝浮  
滄海春蠶既無食寒衣欲誰待本不植高原今日復何

悔  
原陶潛歸田園居  
野外罕人事窮巷寡輪鞅白日

掩荆扉虛室絕塵想時復墟曲中披草共來往相見無  
雜言但道桑麻長桑麻日已長吾土日已廣常恐霜霰  
至零落同草莽  
增宋謝靈運種桑詩人陳條柯亦有

美攘剔前修為誰故後事資紡績常佩知方誠愧微富  
教益浮陽驚嘉月藝桑迫閒隙疎欄發近郭長行達廣

域墻流始涖泉酒塗猶跬跡俾此將長成慰我海外役  
梁吳均採桑賤妾思不堪採桑渭城南帶減連枝繡  
髮亂鳳凰簪花舞依長薄蛾飛愛綠潭無由報君信流  
涕向春蠶陌上桑娟娟陌上桑蔭陌復垂塘長條映  
白日細葉隱鸝黃蠶飢妾復思拭淚且提筐故人寧知  
此離恨煎人腸劉邈萬山見採桑人倡妾不勝愁結  
束下青樓逐伴西城路相攜南陌頭葉盡時移樹枝高  
乍易鉤絲繩挂且脫金籠寫復收蠶飢日已暝詎為使



君留 王臺卿陌上桑 令月開和景處處動春心挂筐

須葉滿息倦重枝陰 沈君攸採桑 南陌落花移蠶妾

畏桑萎逐便牽低葉爭多避小枝摘駛籠行滿攀高腕  
易疲看金怯舉意求心自可知 北周王褒陌上桑人

傳陌上桑未曉已含光重重相蔭映軟弱自芬芳秋胡  
未住馬羅敷未滿筐春蠶朝已老安得久徬徨 陳傅

緯採桑羅敷試採桑出入城南傍綺裙映珠珥絲繩提  
玉筐度身攀葉聚聳腕及枝長空勞使君問自有侍中

郎賀徹採桑

蠶妾出房櫳結伴類花叢度水春衫綠

映日晚妝紅釧聲時動樹衣香自入風鉤長嫩枝曲葉  
盡細條空競採須盈手爭歸欲滿籠自憐公府步誰與  
少年同

唐劉希夷採桑楊柳送人行青青西入秦誰

家採桑女樓上不勝春盈盈灞水曲步步春芳綠紅臉  
耀明珠絳唇含白玉回首渭橋東遙憐春色同青絲嬌  
落日綰綺弄春風攜籠長嘆息逶迤戀春色看花若有  
情倚樹疑無力薄暮思悠悠使君南陌頭相逢不相識

歸去夢青樓

原李白陌上桑

美女渭橋東春還事蠶

作五馬如飛龍青絲結金絡不知誰家子調笑來相謔  
妾本秦羅敷玉顏艷名都綠條映素手採桑向城隅使  
君且不顧況復論秋胡寒蟬愛碧草鳴鳳栖青梧託心  
自有處但怪旁人愚徒令白日暮高駕空踟躕子夜  
吳歌秦地羅敷女採桑綠水邊素手綠條上紅妝白日  
鮮蠶飢妾欲去五馬莫留連

常建陌上桑翳翳陌上

桑南枝交北堂美人金梯出素手自提筐非但畏蠶飢

盈盈嬌路傍

增

李彥遠採桑採桑畏日高不待春眠

足攀條有餘愁那矜貌如玉千金豈不贈五馬空躑躅

何以變貞性幽篁雪中綠

王建採桑鳥鳴桑葉間綠

條復柔柔攀看去手近散作長長鉤黃花蓋野田白馬

少年遊所念豈迴顧良人在高樓

劉駕桑婦墻下桑

葉盡春蠶半未老城南路迢迢今日起更早四鄰無去

伴醉臥青樓曉妾顏不如誰所貴守婦道一春常在樹

自覺身如鳥歸來見小姑新妝弄百草于濱田翁歎

桑手植千樹桑文杏作中梁頻年徭役重盡屬富家郎  
富家田業廣用此買金章昨日門前過軒車滿垂楊歸  
來說向家兒孫竟咨嗟不見千樹桑一浦芙蓉花 元

趙孟頫題織圖正月正月新獻歲最先理農器女功並

時興蠶室臨期治初陽力未勝早春尚寒氣窓戶當與  
密勿使風雨至田疇耕耨動敢不脩耒耜經冬牛力弱  
相戒勤飯飼萬事非預備倉卒恐不易田家亦良苦舍  
此復何計 二月仲春凍初解陽氣方滿盈旭日照原

野萬物皆欣榮是時可種桑插地易抽萌列樹徧阡陌  
東西各縱橫豈惟籬落間採葉憚遠行大哉皇元化四  
海無交兵種桑日已廣彌望綠雲平匪惟錦綺謀祇以  
厚民生  
三月三月蠶始生纖細如牛毛婉孌閨中女  
素手握金刀切葉以飼之擁紙散周遭庭樹鳴黃鳥發  
聲和且嬌蠶飢當採桑何暇事遊遨田時人力少丈夫  
方種苗相將挽長條盈筐不終朝數口望無寒敢辭終  
歲勞  
四月四月夏氣清蠶大已屬眠高首何昂昂蛾

眉復娟娟不憂桑葉少徧野如綠煙相呼携筐去迢遞  
立遠阡梯空伐條枚葉上露未乾蠶飢當早歸秉心靜  
以專飭躬修婦事僣勉當盛年救忙多女伴笑語方喧  
然五月五月夏以半谷鶯先弄晨老蠶成雪繭吐絲  
亂紛紜伐葦作簿曲束縛齊榛榛黃者黃如金白者白  
如銀爛然滿筐筥愛此顏色新欣欣舉家喜稍慰經時  
勤有客過相問笑聲聞四鄰論功何所歸再拜謝蠶神  
六月釜下燒桑柴取繭投釜中纖纖女兒手抽絲疾

如風田家五六月綠樹陰相蒙但聞繰車響遠接村西  
東旬日可經絹弗憂杼柚空婦人能蠶桑家道當不窮  
更望時雨足二麥亦稍豐酤酒田家飲醉倒嫗與翁

七月七月暑尚熾長日弄機杼頭蓬不暇梳揮手汗如  
雨嚶嚶時鳥鳴灼灼紅榴吐何心娛耳目往來忘偃僂  
織為機中素老幼要紉補青燈照夜梭蟋蟀窻外語辛  
勤亦何有身體衣幾縷嫁為田家婦終歲服勞苦

八

月池水何洋洋漚麻水中央數日庶可取引過兩手長



織絹能幾時織布已復忙依依小兒女歲晚歎無裳布  
襦不掩脰念之熱中腸朝緝滿一籃暮緝滿一筐行看  
機中布計日漸可量我衣苟已成不憂天早霜

九月

季秋霜露降凜凜寒氣生是月當授衣有布織未成天  
寒催刀尺機杼可無營教女學紡繡舉足疾且輕舍南  
與舍北嘒嘒聞車聲通都富豪家華屋貯娉婷被服雜  
羅綺五色相間明聽說貧家女惻然當動情

十月豐

年禾黍登農心稍逸樂小兒漸長大終歲荷鋤耰目不

識一字每念心作惡東鄰方迎師收拾令上學後月日  
南至相賀因舊俗為女裁新衣脩短巧量度龜手事塞  
向庶禦北風虐人生真可歎至老長力作 十一月冬

至陽來復草木潛滋萌君子重其然吾道自此亨父母  
坐堂上子孫列前榮再拜稱上壽所願百福并人生屬  
明時四海方太平民無札瘥者厚澤敷羣情衣食苟給  
足禮義自此生願言興學校庶幾教化成 十二月忽

忽歲將盡人事可稍休寒風吹桑林日夕聲颼颼墻南

地不凍墜掘為坑溝斫桑埋其中明年芽早抽是月浴  
蠶種自古相傳流蠶出易脫殼絲續亦倍收及時不努  
力知有來歲不手凍不足惜薰免號寒憂

明李東陽

采桑玉堂陰二首答篁墩學士采桑玉堂陰分蠶長安  
郭一勞累百枚再分連數箔寧知富貴地此物能沃若  
平生畎畝憂黽勉懷力作嗟彼衣錦兒空言養蠶樂吳  
機詠濯濯周葉歌莫莫遺我通家人同心故相託愛之  
敢輕棄弱女方就學采桑玉堂陰陰濃樹婆娑一采

不滿筐竟日能幾何乃知富貴地不及窮山阿蠶成忽  
滿眼所得良亦多人言繫家運或者陰陽和向非夙夜  
勤豈恃葉與柯衣多必思寒吾民本同科欲將分蠶意  
廣被無偏頗

七言古詩增陳徐伯陽賦得日出東南隅行朱城璧日  
啓朱扉青樓含照本暉暉遠映陌上春桑葉斜入秦家  
綳綺衣羅敷妝粉能佳麗鏡前新梳倭墮髻圓籠裏  
挂青絲鐵鈎冉冉勝丹桂蠶飢日晚暫生愁忽逢使君

南陌頭五馬停珂遣借問雙臉含嬌特好羞妾壻府中  
輕小史即今來往專城裏欲識東方千騎歸藹藹日暮  
紅塵起  
宋鄭震採桑曲晴採桑雨採桑田頭陌上家  
家忙去年養蠶十分熟蠶姑只著麻衣裳

五言律詩增宋梅堯臣傷桑桑條初變綠春野忽飛霜  
田婦搔蓬首冰蠶絕繭腸名輩依麥畦戴勝繞枝翔不  
見羅敷騎金鈎自挂牆

五言絕句增唐鄭谷採桑向曉携籠去桑村路隔淮何

如鬪百草賭取鳳凰釵

劉駕秦娥秦娥十四五面白

于指爪羞人夜採桑驚起戴勝鳥

王周採桑女二首

渡水採桑歸蠶老催上機扎扎得盈尺輕素何人衣

採桑知蠶飢投梭惜衣遲誰誇羅綺叢新畫學月眉

宋王安石採桑溪橋接桑畦鉤籠曉羣過今蚤去何蚤

句晚蠶恐臥

明楊基陌上桑青青陌上桑葉葉帶春

雨已有催絲人咄咄桑下語

六言絕句

御製桑林乍綠蠶事方興詩以嘉之彌望桑林吐葉垂枝嫩  
碧初勻竹舍正殷蠶務天工雨露維均

七言絕句

御製岸側桑葉初碧夾岸青青遶御舟濃桑初茁滿村謳省  
方徧問蠶家苦春雨連絲盡日憂

題織圖浴蠶豳風曾

著授衣篇蠶事初興穀雨天更考公桑傳禮制先宜浴種  
向晴川  
二眠柔桑初翦綠參差陌上歸來日正遲村舍  
家家簾幕靜春蠶新長再眠時  
三眠紅女勤劬日載陽

鳴鳩拂羽恰條桑只因三卧蠶將老翦燭頻看夜未央

大起春深處處掩茆堂滿架吳蠶婦子忙料得今年收穫  
倍冰絲雪縷可盈筐 捉績連宵食葉正紛紛風雨聲喧

隔戶聞喜見新蠶瑩似玉燈前檢點最辛勤

分箔愛逢

晴日映疎簾新綠如雲葉漸添天氣晴和蠶事廣移筐分

箔徧茅簷

採桑桑田雨足葉蕃滋恰是春蠶大起時負

筥携筐喧笑語載鴛飛上最高枝

上簇頻執纖筐不厭

疲久忘膏沐與調饑今朝士女歡顏色看我冰蠶作繭時



灸箔蠶性由來苦畏寒深垂簾幕夜將闌鑪頭更熬松  
明火老嫗殷勤日探看 下簇自昔蠶繅重婦功曾聞獻

繭在深宮披圖喜見纍纍滿茆屋清光積雪同 擇繭冰

繭方堪作素紃重綿亦藉禦深寒就中自有因材法揀取

筐間次第觀 窖繭一年蠶事已成功歷數從前屬女紅

聞說及時還窖繭荷鋤又向綠陰中 練絲炊煙處處繞

柴籬翠釜香生煮繭時無限經綸從此出盆頭喜色動雙

眉 蠶蛾蛾兒布子如金粟水際分飛任所之莫令繭絲

遺利盡來年留作授衣資

祀謝勞勞拜簇祭神桑喜得

絲成願已償自是西陵功德盛萬年衣被澤無疆

緯綠

陰揜映野人家每到蠶時靜不譁一自夏初成繭後籬邊

新聽響繅車

織從來蠶績女功多當念勤勞惜綺羅織

婦絲絲經手作夜寒猶自未停梭

絡緯無衣卒歲早關

情寒氣催人蟋蟀聲茅屋疎籬秋夜永短檠相對絡絲成

經織紅精勤有季蘭牽絲分理製羅紈鳴機來往桑陰

裏已作吳綃匹練看

染色凝膏比潔絡新絲傳得仙方

色陸離一代文明資賁飾須教五采備彰施  
攀花巧樣

爭傳濯錦紋堪憐織女最殷勤雲章霞綵娛人意自著尋

常縞布裙  
翦帛手把齊紈冰雪清秋衣欲製重含情逡

巡莫漫施刀尺萬縷千絲織得成  
成衣已成束帛又縫

紉始得衣裳可庇身自昔宮庭多澣濯總憐蠶織重勞人

增唐來鵬蠶婦曉夕採桑多苦辛好花時節不閑身若

教解愛繁華事凍殺黃金屋裏人  
汪遵採桑婦為報

躊躇陌上郎蠶飢日晚妾心忙本來若愛黃金好不肯

携籠更採桑

宋楊修蠶室摘繭抽絲女在機茅檐葦

箔舊堂扉年年桑柘如雲綠翻織誰家錦地衣

陸游

示客桑柘成陰百草香縑車聲裏午風涼客來莫說人

間事且共山林夏日長

范成大科桑斧斤留得萬枯

株獨速槎牙立暝途飽盡春蠶收罷繭更殫餘力付樵

蘇

楊萬里桑疇

夾岼瀕河種穉桑春風吹出萬條長

船行老眼渾多忘喚作西湖插拒霜

方岳農謠雨過

一村桑柘煙林梢日暮鳥聲妍青裙老姥遙相語今歲

春寒蠶未眠

金劉瞻春郊桑芽粒粒破春青小葉迎

風未展成寒食歸寧紅袖女外家紙上看蠶生

原明

陳繼儒女桑新綠映宮槐三月春風戴勝來織就鴛鴦  
錦千疋金刀先取合歡裁增沈天孫採桑曲青溪女  
兒愛羅裙提筐陌上蹋春雲蠶飢日暮思歸去不敢回  
頭看使君

詩散句增魏曹植美女妖且閒采桑岐路間柔條紛冉  
冉落葉何翩翩出自薊北門遙望湖池桑枝枝自相

值葉葉自相當

宋鮑照

季春梅始落女工事蠶作采

桑淇洧間還戲上宮閣

梁簡文帝寄語採桑伴訝今

春日短枝高攀不及葉細籠難滿

原江淹但願桑麻

成蠶月得紡績

增唐儲光羲碓喧春澗滿梯倚綠桑

斜李白吳地桑葉綠吳蠶已三眠

燕草如碧絲秦

桑低綠枝

及此桑葉綠春蠶起中閨

杜甫桑柘葉

如雨飛蠶共徘徊

聶夷中勸爾毋伐桑減爾身上服

宋梅堯臣二月起蠶事伐桑又阻饑

王安石澗谷

芳菲少春風著野桑

唐杜牧深處會容高尚者水苗

三頃百株桑

韓偓萬里清江萬里天一村桑柘一村

煙

宋唐庚魚陂舊種千頭鱸桑徑新窠十畝繒

張

舜民洲中未種千頭橘宅畔先栽百本桑

唐王維蠶

眠桑葉稀

李白日出明桑枝

桑柘綠如雲

岑參

桑葉隱村戶

張謂夏雨桑條綠

孟郊野桑無直柯

張籍桑柘羅平蕪

溫庭筠沃田桑葉晚

李嘉祐

清明桑葉小

于濬青春滿桑柘

宋蘇軾萬樹桑柘

美 唐庚蠶罷野無桑

金史肅平林半是桑

唐上

官儀葉密鶯啼帝女桑

杜甫舍西柔桑葉可拈

李

頻桑林蠶後盡空條

朱慶餘桑柘成村百畝間

曹

唐桑葉扶疎閉日華

宋司馬光滿川濃綠土宜桑

王安石柔桑採盡綠陰稀

陸游桑眼綻來蠶事興

霜清南陌課剡桑 蠶飢衝雨采青桑

金秦畧柔青

初散壠頭桑

元好問童童翠蓋桑初合

明楊基黃

梅雨晴桑重綠



詞原明王世貞浣溪沙一夜春波釀作藍曉桑桑葉綠

鬢髮鬢髮十五太嬌憨織作雙魚成比目偷將百草

鬪宜男更無心緒餵春蠶增宋賀鑄憶秦娥著春衫

玉鞭鞭馬城南城南城南柔柔嫩草留住金銜粉娥

采葉供新蠶蠶飢畧許携纖纖携纖纖湔裙淇上更待

初三錦纏道雨過園林觸處落紅凝綠正桑葉齊如

沃嬌羞只恐人偷看背立墻陰慢展纖纖玉聽啼鳩

幾聲耳邊相促念蠶飢四眠初熟勸路傍立馬莫踟躇

是那裏唱道秋胡曲

別錄增種樹書畜蠶者常以三月三日雨卜桑葉之貴  
賤諺云雨打石頭徧桑葉三錢片或曰四日尤甚杭州  
人云三日尚可四日殺我言四日雨尤貴 午日不得  
鋤桑園 桑濕不可飼蠶雨中採至必拭令乾恐有傷  
也 湧幢小品湖州畜蠶者多自栽桑否則預租別姓  
之桑俗曰秒桑凡蠶一斤用葉百六十斤諺云仙人難  
斷葉價故栽與秒為最穩否則謂之看空頭蠶有天幸

者往往趣之

原桑葉炙熟可代茶

嫩桑枝炒香煎

飲久服不患偏風

種植便民纂要取黑椹中段子收

貯勿令溼濕將種時先以柴灰淹揉次日淘淨取沉水  
者曬令乾去水氣種乃易生宜肥地有草鋤淨冬月燒  
去苗至春去冗苗留旺者俟至指大移栽五步一株大  
約種子不如壓條 初芽時擇指大枝條旺相肥澤者  
就馬蹠處劈下潤土內開溝尺許埋實自然生根布葉  
壓後遇早於傍開溝灌之但取水氣到忌多著水農桑

要旨云平原淤壤土地肥虛荆桑魯桑俱可種若山地  
土脈赤硬止宜荆士民必用云種藝在審時又合地宜  
使不失其中春分前十日為上時當發生也十月小春  
木氣長生也亦可壓桑有三宜時宜和包宜固壅宜厚  
大抵天氣清明巳午時借其陽和如栽子已出忽變天  
氣即以熱湯調泥培之暑月必待晚涼仍預於園中稀  
種麻麥為蔭惟十一月不生農桑撮要云十二月內掘  
坑深闊約二小尺却於坑畔取土糞和成泥漿桑根埋

定糞土培壅與地平次日築實切不可動搖其桑加倍  
榮旺勝如春栽 又法將桑根浸糞水一宿掘坑栽之  
栽宜淺種以芽稀者為上諺云臘月栽桑桑不知 增  
汜勝之書種桑法每畝以黍耧子各三升合種之黍桑  
當俱生鋤之桑令稀疎調適黍熟穫之桑生正與黍高  
平因以利鎌摩地刈之曝令燥後有風調放火燒之常  
逆風起火桑至春生一畝食三箔蠶 齊民要術桑柘  
熟時收黑魯耧即日以水淘取子曬燥仍畦種常耨令

淨明年正月移而栽之率五尺一根其下常掘種小荳  
綠荳栽後二年慎勿採沐大如臂許正月中移之率十  
步一樹行欲小犄角不用正相當須取栽者正月二月  
中以鈎弋壓下枝令著地條葉生高數寸仍以燥土壅  
之明年正月中截取而種之

種樹書穀樹上接桑其

葉肥大桑上接梨脆美而甘撒子種桑不若壓條而分  
根莖 澗間植桑斬其葉而植之謂之稼桑却以螺殼  
覆其頂恐梅雨侵損其皮故也二年即盛

農政全書

玄扈先生曰接桑莫如當年條為妙三年之說不然也  
且接時必待月暗自下弦至上弦皆可晦尤妙自上弦  
至下弦皆忌望尤險 取葑與雞鴨食之糞中淘出種  
者更不生葑 本新書曰地桑本出魯桑須以魯桑萌  
條如法栽培揀肥旺者約留四五條鋤治添糞條有定  
數葉不繁多衆葉脂膏聚於一葉其葉自大即是地桑  
王禎曰齊民要術栽取榘之黑者翦去兩頭惟取中  
間一截蓋兩頭者其子差細種則成雞桑花桑中間一

截其子堅栗則枝幹堅強而葉肥厚將種之時先以柴灰淹揉次日水淘去輕秕不實者曬令水脈才乾種乃易生 士農必用地桑之功惟在治之如法不致荒燥

桑者易生之物除十一月不生活餘月皆可仍須於園內稀種糝或麻黍為蔭 斫樹法自移栽時便割去梢既不留中心其條自向外長 科條法有四等一漑

水條

向下垂者

一刺身條

向裏生者

一駢指條

相併生者

一冗脰條

雖順

生却臘月為上正月次之

博聞錄白桑少子壓枝種



之若有子可使種須用地陰處其葉厚大得繭重實絲  
每倍常 原採桑高者用梯摘庶不傷枝遠出強枝當  
用闊刃鋒利扁斧轉腕回刃向上斫之枝查既順津脈  
不出葉必復茂諺曰斧頭自有一倍葉此善用斧之效  
也桑桑高枝不勝梯須置桑几如高橈下列二枕作登  
級斯易摘葉又不傷樹 培桑凡耕桑田不用近樹犁  
不著處斫土令起斫去浮根以蠶矢糞之根下埋龜甲  
則茂盛而不蛀生黃衣亦以此治之 修桑削其小枝

則葉茂去其枯枝則不荒蠶事畢將枝髡去但髡時不  
可留嘴角及夏至開掘根下用糞或蠶沙培壅則生意  
鬱積來年嫩枝之葉更覺茂盛且皮可製紙枝可當柴  
兼有餘利

附錄桑椹

增說文甚桑實也

本草桑子曰椹

椹與甚通集韻  
一作醢一作黹

李

時珍曰椹有烏白二種

彙考增詩衛風吁嗟鳩兮無食桑甚傳鳩鵲鳩也食桑

甚過則醉而傷其性

魯頌

翩彼飛鴉集于泮林食我

桑黷懷我好音傳黷桑實也

爾雅桑辨有甚梔注辨

半也疏桑樹一半有甚半無甚為梔

晉書張天錫傳

會稽王道子問西土所出天錫應聲曰桑甚甘香鴟鴞

革響乳酪養性人無妒心

隋書循吏傳趙軌少好學

有行檢東鄰有桑甚落其家軌遣人悉拾還其主誠其

諸子曰吾非以此求名意者非機杼之物不願侵人汝

等宜以為誠

北史崔逞傳道武攻中山未剋六軍乏

糧問計於逞逞曰飛鴉食甚而改音詩稱其事可取以

助糧帝乃聽人以甚當租

神異經東方有桑焉椹長

三尺五寸圍如長

東觀漢記蔡君仲汝南人至孝王

莽亂人相食君仲取桑椹赤黑異器賊問仲仲答曰黑

者供母赤者自食賊異之遺鹽二斗

漢武帝內傳神

仙上藥有扶桑丹椹

魏畧楊沛為新鄭長興平末人

多飢窮沛課民益畜乾椹收螢豆閱其有餘以補不足

如此積得千餘斛藏在小倉會太祖為兖州刺史西迎

天子所將千餘人皆無糧過新鄭沛謁見乃皆進乾椹  
太祖甚喜後賜生口十人絹百疋以報乾椹也 魏書

袁紹之在河北軍人仰給桑椹 神仙傳班孟者不知

何許人或云女子也人家有桑果數千株皆聚之成積  
如山如此十餘日吹之各還本處 異苑北方有白桑

椹長數寸食之甘美 漢興平元年九月桑再椹時劉

玄德軍小沛年荒穀貴士衆皆飢仰以為糧 晉武帝

大元中太原王戎為鬱林太守泊船新亭眠夢有人以

七枚榘子與之著衣襟中既寤得榘如夢中 發蒙記

鳩以桑榘為酒謂飲之即醉也 拾遺記員嶠山有木

名猗桑煎榘以為蜜 原金樓子始皇聞鬼谷先生言

故遣徐福入海求金菜玉蔬并一寸榘

集藻表增唐李嶠為鳳閣侍郎李元素進冬榘表臣某

言聞京兆萬年縣大寧坊有桑一株暮秋生子初冬榘

熟今謹取得專輒進奉伏惟陛下惠覃區寓仁洎草木

故得神蠶之樹發秀於寒露之辰帝女之林結實於繁

霜之下出於萬年之界彰一人萬歲之符生自大寧之  
坊表羣生大安之慶鴟鵂已革見蠻貊之懷音絲繭行  
豐知府歲之逾實殊禎符委絕貺仍臻凡在含生孰不  
忻慶無任忭躍之至

賦增晉傅玄桑椹賦繁實離離含甘吐液翠朱三變或  
玄或白嘉味殊滋食之無數

七言絕句增宋陸游詠園中草木日高未辦續晨炊一  
椀村醅且療飢槃箸索然君勿笑桑間紫椹正累累

詩散句增唐羅隱紫飽垂新椹

宋司馬光桑陰青青

紫椹垂

張耒桑間椹熟麥齊腰

陸游鬱鬱林間桑

椹紫

桑林紫椹纍纍熟桑間椹紫蠶齊老

別錄增

本草衍義本經言桑甚詳然獨遺烏椹桑之精

英盡在於此采摘微研以布濾汁石器熬成稀膏入蜜

熬稠貯瓷器中滾湯點服消熱止渴其性微涼故也仙

方日乾為末蜜和為丸酒服亦良

本草綱目楊氏產

乳云孩子不得與桑椹食令兒心寒四時月令云四月



宜飲桑椹酒能理百種風熱其法用椹汁三斗重湯煮至一斗半入白蜜二合酥油一兩生薑一合煮令得所瓶收每服一合和酒飲之亦可以汁熬燒酒藏之經年味力愈佳史言魏武帝年乏食得乾椹以濟飢金末大荒民皆食椹獲活者不可勝計則椹之乾濕皆可救荒平時不可不收採也

原收椹	農桑撮要	子熟時摘取
-----	------	-------

以水淘過畧曬乾便掘深坑種之或畦種之便生即時多收椹子以待來春種尤佳收貯勿近濕壁牆邊則浥

損不生 學山蠶經 五月也收桑椹而水淘少曬焉畦而種之至冬而焚其梢及明年而分種之

附桑寄生錄

增本草別錄曰桑上寄生生弘農川谷桑樹上三月三日采莖葉陰乾韓保昇曰諸樹多有寄生莖葉並相似云是鳥食物子糞落樹上感氣而生葉如橘而厚輒莖如槐而肥脆處處雖有須桑土者佳非自采即難以別可斷莖視之色深黃者為驗朱震亨曰桑寄生藥之要

品而人不諳其的近海州邑及海外之境其地暖而不  
蠶桑無採捋之苦氣濃意厚自然生出也李時珍曰寄  
生高者二三尺其葉圓而微尖厚而柔面青而光澤背  
淡紫而有茸川蜀桑多時有生者他處鮮得須自采或  
連桑採者乃可用

別錄原梧潯雜佩桑寄生酒出梧州色白味頗清冽晉  
張華詩蒼梧竹葉清陳張正見詩浮蟻擅蒼梧皆謂此  
第釀者必和以燒酒以氣候炎蒸恐酒味易敗故耳飲

勿過多

附桑花  
錄

增本草桑花一名桑蘚一名桑錢生桑樹上白蘚如地  
錢花樣不是桑榘花也能健脾澀腸止血

柘

增古今注柘實曰佳

音雖言佳  
鳥所食也

本草按陸佃埤雅云

柘宜山石柘之從石取此義冠宗奭曰柘木裏有紋亦  
可旋為器葉可飼蠶曰柘蠶然葉硬不及桑葉李時珍

曰處處山中有之喜叢生幹疎而直葉豐而厚團而有  
尖其葉飼蠶取絲作琴瑟絃清響勝常爾雅所謂棘繭  
即此蠶也其實狀如桑子而圓粒如椒其木染黃赤色  
謂之柘黃

彙考增詩大雅攘之剔之其檠其柘疏攘去之剔翦之  
者其為檠木其為柘木之材也集傳檠山桑也與柘皆  
美材可為弓榦又可蠶也禮記投壺投壺矢以柘若  
棘毋去其皮注取其堅且重也考工記弓人為弓取

幹之道七柘為上

唐書南蠻傳自曲靖州至滇池食

蠶以柘蠶生閱二旬而繭織錦縑精緻

新論楚柘質

勁必資榜槩以成彈弓

清異錄張曲江里第之側有

古柘嘗因狂風發其一根解為器具花紋甚奇人又以

公之手筆冠世目之曰文章樹

羣碎錄古史考曰柘

樹枝長而勁烏集之將飛柘樹反起彈烏烏乃號呼此

枝為弓快而有力因名烏號之弓

博聞錄柘葉豐而

厚春蠶餐之其絲以冷水繅之謂之冷水絲

別錄增齊民要術種柘法耕地令熟耨耩作壟柘子熟時多收以水淘汰令淨曝乾散訖勞之草生拔却勿令荒沒三年間剷去堪作渾心扶老杖十年中四破為杖任為馬鞭胡床十五年任為弓材亦堪作屐裁截碎木中作錐刀靶二十年好作犢車材欲作鞍橋者生枝長三尺許以繩縛旁枝木橛釘著地中令曲如橋十年之後便是渾成柘橋欲作快弓材者宜於山石之間北陰種之

附錄  
奴柘

增本草陳藏器云奴柘生江南山野似柘節有刺冬不凋李時珍曰此樹似柘而小有刺葉亦如柞葉而小可飴蠶

御定佩文齋廣羣芳譜卷十一